



金瓜糜的滋味

思念這款物件實在真使人好玄，若像深根佇人的心內，無張無持喝出穎(ínn)就出穎。來攞無咧通知！走？毋知通相辭！

這日，踏著紅霞鋪的產業道路轉來。滿天的火燒雲使我的心沖沖滾，滾甲無注意著沿路蝦箝草的tap纏。行過稻埕坐佇廳頭椅條(liâu)，蝦箝草這種顧人怨的野草纏佇我的褲跤經綴(kinn tuè)我入門。

這時，數念的根也綴蝦箝草的跤步偷偷仔行入tsín時的點滴，也使我閣再鼻著彼碗金瓜糜的芳氣。

往過，為著欲較早食著大漢阿媽為阮準備的放學tām-sám止飢的點心。阮竭根行雞腸彎曲小路，就算是予蝦箝草黏甲規衫墘褲跤嘛毋驚。結果咧？金瓜糜猶未扒著，大漢阿媽的膨餅先食甲飽ti-tu。膨餅那食，蝦箝草那捻(liàm)。等到蝦箝草捻煞，金瓜糜嘛頓拷去矣。啥人會知青盲貓拄著死尖喙的。頓拷的金瓜糜煞變成一粒一粒的山珍海味。

起初毋知這味的按怎號叫。對阿媽阿狗氣講：「阿媽，這碗番薯糜讚！」阿爸講老大人攞嘛困仔性，sīng度共伊褒幾句，看阿媽拄仔搵膨餅tsín捻蝦箝草的手敢會略仔歇喘，伸來共阮的頭掌掌咧，呵咾阮真乖！

無講無打緊，大漢阿媽破聲講：「你冊是讀對佗去？目調tshuh-tshuh，金瓜看做番薯。」我sannh氣彼碗糜的甜味，連措佇尻脊餅的冊包都袂顧得提落來。我tì-tu共大漢阿媽講：「冊佇尻脊餅啊。」

日後我一直咧想，成做一个廚子師傅，透日俗火走飄。也敢是為著走揣金瓜糜的滋味啦。毋kú見在我按怎俗火爐kà速度，大漢阿媽的手路我就是撓無路來。殘殘心肝掠坦橫，管伊上班請假扣薪hō。共頭家請兩工仔。暫時放下俗火走相逐(jip)的日子，轉來草地看山看海畫山水。順繼走揣困仔時陣每日期待放學的滋味。

佇廳頭捻蝦箝草的時，大漢阿媽的五筋枷重重敲佇後頭擴(khok)：「大武人大武種矣，蝦箝草閣紮甲廳頭來。」我對捻蝦箝草的點滴中khín眠。設使大漢阿媽的五筋枷若真正khà甲我的後頭擴痛tiuh-tiuh毋知佻好。

想咧想咧，彼句俗大漢阿媽半心適的話煞含佇喙邊：「阿媽，金瓜是咧食按怎的？」阿媽在來是一个興講huā的人。聽著金孫佻伊痾話規廳：「冊措佇尻脊餅。」早就想欲揣空縫展現講huā的手勢。食頭殼一空的、食喙會振動的、食gâu放屎的。阿媽本成就毋是雅氣的人，我金瓜糜那扒，伊屎話那練，早就慣勢這種場面。一點仔都無kō垃圾金瓜糜糖甘甜的滋味。

尾仔我為著欲揣金瓜糜的滋味，資料揣透透。才知大漢阿媽的話其實有伊生活的智慧佇咧。金瓜毋但會當通腸解秘結，而且伊對現代人的文明病閣有真大的功效。像講癌啦、糖尿病、高血壓等等，有影是大漢阿媽講的：「有食有行氣。」

大漢阿媽硬giah無愛人使暗路。我呵咾伊呵咾甲會觸舌，伊的五筋枷煞對同對同對後擴批(tim)落。是為按怎？原來是伊的金孫將金瓜皮揀規桌墩。

「毋成困。生食都無夠，你閣想欲曝乾。」彼陣的我有影是啞口的砵(teh)死困。我只是無愛食皮，我哪有欲曝乾？

Tsín共伊想來，大漢阿媽彼下有影真傷重。彼下都經過遮爾久矣，這久閣略仔感覺著大漢阿媽的力頭。檢采是因為尾矣查出金瓜皮也有伊的營養份佇咧。像娘仔瓜、菜瓜、臭柿仔，個的皮攏嘛有個的價值。查某困仔愛嬌毋驚流鼻水，金瓜皮就是上好的漂白水。我想，大漢阿媽雄雄起花面穩當是我無共天然的皮膚漂白水留予伊。我若共金瓜皮留佇碗墩。無的確我的後擴就袂像地牛翻身，傷重。

食著藥，青草一葉。毋是我咧褒so，大漢阿媽有影是臭頭厚藥！

啥人會知張天師也有著鬼迷的時陣。厝內的金瓜規田園，青草千萬葉。大漢阿媽煞因為高血壓來斷腦筋。好佳哉閻羅王毋願收入厝帖。大漢阿媽雖然大難不死，不過也煞來半身不遂。大漢阿媽倒落去了後，金瓜糜的滋味嘛綴咧包圍好勢坐佇輪椅頂。

總算是剝lut蝦箝草的tah纏。我輕聲行入去大漢阿媽的房間，阿媽坐佇輪椅頂，目睷無神看我。無啥會tsih力的左手沓沓仔想欲出力撐懸。我知影愛滾笑的伊想欲創啥！我共伊的手圍佇我的後擴，希望伊用伊的五筋枷批我這個毋知珍惜山珍海味的失格的廚子師傅。

暫時揸摺hāu-khat仔換擗筆的手行到遮，廳頭桌頂的草紙早就予數想金瓜糜糖甘甜的喙瀾水恰毋甘的目屎tò澹。無才調閣寫落去。

創 作 理 念

藉著對金瓜的認識，書寫恰大漢阿媽的感情。記持中，有笑聲、有趣味。有目屎、有感傷。感傷時間流洩的無奈，人生生老病死的傷懷。



陳廷宣

大中華廣東粥店長